

# AKEPT, UMS lancar projek kerjasama tambah baik sistem UniLead

UB 06.11.2024 P.04

**KOTA KINABALU:** Akademi Kepimpinan Pendidikan Tinggi (AKEPT) dan Universiti Malaysia Sabah (UMS) telah menandatangani kerjasama bagi projek penambahbaikan sistem University Leadership Directory (UniLead), baru-baru ini.

Sistem UniLead merupakan sistem sehati yang digunakan AKEPT, Kementerian Pendidikan Tinggi (KPT) dan semua institusi pendidikan tinggi awam (IPTA).

Ia menjana maklumat analisis profil kompetensi calon berpotensi tinggi bagi membantu proses pembuatan keputusan berkaitan pengisian pemilihan jawatan strategik di IPTA.

Sistem UniLead juga bertujuan membantu pengguna mengurus proses pembangunan latihan bersesuaian dengan lebih cekap, efisien dan telus untuk memperkasa kumpulan bakat.

Pendaftar UMS, Luqman Ridha Anwar, berkata projek itu merupakan inisiatif penting yang bakal memberikan impak besar kepada KPT, AKEPT dan semua universiti awam dalam usaha memperkukuh bakat dalam sektor pendidikan tinggi.

Katanya, hubungan erat

antara AKEPT dan UMS bukan suatu yang baharu, bahkan telah terjalin sejak sekian lama melalui pelbagai kolaboratif latihan dan program kepimpinan.

Beliau berkata AKEPT dan Bahagian Kepimpinan dan Pembangunan Bakat (BKEPT) di Jabatan Pendaftar UMS telah bekerjasama rapat dalam program memupuk kemahiran dan pembangunan profesional.

“Keakraban dan kerjasama yang sedia terjalin ini memberi asas yang kukuh untuk meneruskan inisiatif bersama dalam pembangunan sistem UniLead,” katanya.

Luqman berkata kerjasama antara AKEPT-UMS diperkukuh melalui program sangkutan yang bermula pada Mac 2023 sehingga Februari 2024 dengan menempatkan dua kakitangan UMS di AKEPT secara bergilir dalam membangunkan modul UniLead diikuti dengan modul latihan.

“Kini dengan permintaan AKEPT untuk menambah baik sistem ini, pasukan kami di UMS berbangga dapat memainkan peranan penting dalam pembangunan modul baharu seperti LeadDNA, yang berfungsi sebagai alat penilaian yang inovatif dan

strategik bagi AKEPT.

“Kami berharap agar kolaborasi erat antara UMS dan AKEPT terus berkekalan dan UMS komited untuk menyokong AKEPT dalam inisiatif masa depan berkaitan dengan transformasi digital dalam kepimpinan pendidikan tinggi,” ujar Luqman.

Penambahbaikan sistem UniLead adalah untuk memastikan kelangsungan pengurusan sumber manusia berasaskan kompetensi yang boleh diakses oleh pengurusan AKEPT dan Unit Pengurusan Bakat di semua IPTA.

Data tersebut akan dapat membantu dalam perancangan latihan kelompok bakat kepimpinan universiti yang boleh dipantau secara berkala dan diurus dalam satu proses ekosistem sumber manusia yang berstruktur.

Turut hadir Pengarah AKEPT Prof. Dr. Hars-hita Aini Haroon; Timbalan Pengarah Pusat Pengurusan Bakat AKEPT, Prof. Madya Dr. Norazharuddin Shah Abdullah; Ketua Pegawai Digital UMS, Prof. Dr. Ag. Asri Ag. Ibrahim; Pendaftar AKEPT, Hanis Huzaira Abd Hanan serta Ketua BKEPT UMS, Kamisah Husin.



**KERJASAMA:** Luqman (belakang, tengah) bersama barisan wakil AKEPT dan UMS ketika menandatangani kerjasama projek peambahbaikan sistem UniLead.